

Ganbu Roengz Mbanj

□ Liengz Sinhyungj / 梁新勇

Vunz naeuz, youq ndaw cwngfuj yanghcin guhhong, gij hong haenx cungj dwg caeuq vunz lajmbanj mizgven, ganbu yanghcin aeu roengz mbanj bae, haeuj ranz bouxguhnaz bae, yienghneix cij guh ndaej ndei faenh hong neix.

Youq ndaw cwngfuj yanghcin, gyoengq ganbu haenx haemq noix miz ranzbanhgoeng dinghmaenh, couhcinj miz, hix mbouj ndaej lumj mbanj ganbu ndaw singz yienghhaenx cwxcaih.

Moix ngoenz gyanghaet ngamq hwnjban, gyoengq ganbu yanghcin ngamq byaij haeuj ranzbanhgoeng, aen gumq ngamq naengh nem daengq, gij saenqsik gak cungj gak yiengh couh cienzdaeuj——dieg oij baihdoeng Mbanjcangh dawzfeiz lo, baihsae Mbanjlilj miz vunz aenvih ceng reihnaz yaek doxhoenx lo, aen raengz-romraemx baihnamz ok yungyiemj lo…… Doenghgij saeh neix luenh-nyagnyag, mbouj vaiqdi roengz mbanj bae cawqleix couh deng feiz comh caekhaex bw, yienghneix gij ganbu yanghcin lij miz maz simgei naengh youq ndaw ranzbanhgoeng dem, vaiqdi okdou bae roengz mbanj ha!

Roengz mbanj guhhong, ceiq nanz guh dwg baenzlawz guh doengh gij swhsienj vunzguhnaz, baenzlawz dawz gij cwngcwz baihgwnz gak gaep cwngfuj caeuq bumonz doeksaed daengz lajmbanj bae, baenzlawz gangj daengz gyoengq vunzguhnaz simfug bae. Mizseiz, gij cwngcwz caeuq fapgvi baihgwnz sij ndaej cingcing cujcu, doiq bouxguhnaz miz leih youh miz-ik, hoeng miz saek seiz bouxguhnaz caengz naemj ndaej doeng, yienghneix ganbu yanghcin couh aeu roengz

mbanj bae gangj dauhleix、gangj cwngcwz, gangj daengz doeng bae cij suenq guhhong sat. Mbouj miz banhfap ha, bouxlawz heuh mwngz dwg ganbu yanghcin ne?

Geij bi gonq, gou youq Fuzsuih Yen Liujgiuz Cin Cwngfuj guhhong, bau guenj aen mbanj heuhguh Liujgiuz Segih. Yienznaeuz gangj dwg segih, gizsaed couhdwg aen mbanj ndeu, mbanj neix faensanq baenz 9 aen mbanj iq, miz 3600 lai boux vunz. Miz bi ndeu daengz nienzdaej le, baihgwnz iu’gouz vunzlai gak mbanj aeu camgya sinhhingz nungzcunh hozcoz yihliuz, moix vunz gyau 10 maenz ngaenz, yinvu dou dwg aeu hawj gak mbanj camgya vunzsoq daengz 80% doxhwnj. Seizhaenx, sinhhingz nungzcunh hozcoz yihliuz cwngcwz ngamj saedhengz mbouj geij nanz, vunz lajmbanj caengz rox cwngcwz neix, caemhcaiq caengz ndaej gvaq gij ndeicawq cwngcwz neix. Yienghneix haujlai vunz cungj mbouj saenq geijlai, cungj ndi’ngah camgya. Moix ngoenz banhaemh, gou caeuq ganbu bau mbanj、cunhganbu doengzcaez roengz mbanj, ranz dem ranz bae senhconz fatdoengh. Dou lij beng dienhdaeng daengz gyang mbanj bae, youq gizde an aen lahbah hung, fanfoek senhconz gij ndeicawq sinhhingz hozcoz yihliuz. Yienznaeuz gyoengqvunz daeuj yawj ndaej lai, hoeng dwg yawj nauhnied lai gyau cienz gij noix.

Miz mbanj vunz mbouj gyau ngaenz couh suenq lo, lij baklai bakdeih gangbemx dem: “Gou fouz bingh fouz in, gyau cienz ien’uengj guh maz?” “Gyau geijcib maenz miz maz yungh, dawz ngaenz neix bae

cawx nohmou lij ndaej geij gaen noh gwn daengz nywnx bae!” “Gou gyau cienz le, danghnaeuz gyoengqsou dawz cienz gou bae gwn youh baenzlawz guh?” Miz haemh ndeu, gou caeuq cunhganbu buet hwnj buet roengz, nyaengq daengz doengxhaemh 11 diemj cung, cij byaij ndaej 3 aen mbanj iq 80 lai ranz, gou byaij daengz ga saenz lo, gangj ndaej myaiz hawq lo, hoeng cij miz 40 lai vunz camgya, sou ndaej gij cienz mbouj daengz cien maenz.

Daengz nienzdaej gyoepsuenq, aen mbanj gou bau haenx camgya sinhhingz nungzcunh hozcoz yihliuz beijlaeh cij daengz 60%, mbouj daengz yinvu iu’gouz, mboujdan deng bouxdaeuz bihbingz, hix ngaiz mbanj vunz ndaw mbanj riu, gou couh lumj duznou ndonj haeuj ndaw fung-sieng——song mbiengj cungj souh-heiq, hojsouh lai lo.

Hoeng, naemj daengz swhgeij dwg boux ganbu, ganbu aeu vih bouxguhnaz guh di saeh, couhcinj gienh saeh neix nanz guh hix aeu guh roengzbae. Dou laebdaeb bae senh-conz, vunzlai hix cugciemh raen daengz gij ndeicawq sinhhingz nungz-cunh hozcoz yihliuz lo, gyoengqde couh haengj camgya lo. Daengz bi 2008 nienzdae, Liujgiuz Cin 13 aen mbanj 3 fanh lai vunz, mbouj yungh daengz 10 ngoenz couh fatdoengh ndaej 99% vunzlai camgya, mauhgvaq gij yinvu baihgwnz dingh haenx.

“Aeu sim bae caeuq vunz gyau sim, yienghneix couh mbouj miz saeh maz guh mbouj baenz lo.” Ganbu yanghcin roengz mbanj guhhong, caeuq bouxguhnaz gyau sim, caeuq bouxguhnaz guh baengzyoux, gangj

vahdoj, yienghneix bae guh hong lajmbanj cij swnhleih. Lij miz gienh saeh daegbied ndeu, guh ndei gienh saeh neix le, bouxguhnaz couh caeuq mwngz guh baengzyoux ndei, gienh saeh neix couhdwg gwn laeuj. Seizneix miz gvidingh ganbu mbouj ndaej luenh gwn laeuj lo, hoeng bouxguhnaz mboujguenj mwngz baenzlai, de naeuz laeuj de dwg gag oemq, mbouj aeu ngaenz bae cawx, mwngz caeuq de gwn song cenj, couhdwg yawj ndaej hwnj de. Danghnaeuz mwngz ndi’ngah caeuq de gwn laeuj, mwngz couhdwg yiemz de hoj yiemz de uq. Mwngz naengh ndaej roengzdaeuj caeuq bouxguhnaz caemh daiz gwn laeuj, gyoengqde nyinhnaeuz mwngz yawj-naek de, couh dawz mwngz guh baengzyoux ndei, couh haengj dingq mwngz、boiqhab mwngz, yienghneix haujlai hong lajmbanj couh yungzheih guh lo. Danghnaeuz mwngz bingzseiz haemq noix gwn laeuj, hix aeu dauj di laeuj haeuj vanj bae, guh gij yienghcej “cingzeiq naek, ndoet gaemz ndeu”, bouxguhnaz rox mwngz mizsim couh ndaej lo, mbouj miz vunz aeu gaemh mwngz gwn daengz fiz bae. Danghnaeuz mwngz yawj mbouj hwnj bouxguhnaz, mbouj haengj caeuq gyoengqde guh baengzyoux, gyoengqde raen mwngz cungj gik swt mwngz, mwngz hozhawq siengj gwn gaemz raemx cungj mbouj ndaej!

“Saeh iq vunz lajmbanj, aeu sim bae guh cij baenz.” Gou roengz mbanj guhhong geij bi, roxnyinh ganbu roengz mbanj aeu miz cingz miz eiq, saedsaed caihcaih vih bouxguhnaz guh di saeh. Doengzseiz, ginggvaq guh hong lajmbanj le, gingniemh gou hix cugcienh lai, doiq gou ngoenzlaeng bae guhhong cungj miz yungh lai.

“Daiq gou cij gangj doenghbaez miz bouxsai ndeu, de gyaex boux dahsau ndeu, hoeng boux dahsau haenx mbouj gyaex de, ndigah, doeklaeng……”

“Baenz lo baenz lo! Gij goj neix gou gaenq ndaejnyi geij bak baez lo, dingq ndaej mbwq caez!” Aulungz-gveiz sawqmwh sing hung hat gou, “ba” sing ndeu, gij vanj caeuq dawh gwnz daiz diuq le geij conq sang, buenq vanj laeuj de hix deng sinz okdaeuj haujlai.

Gou deng de hwk baez he, aj bak yawj de, ndawsim cingq ngeix baenzlawz ndaej deuz ok aen ranz iq daemq neix, mboujnex aiq deng de dub.

“Mwngz gaej deuz!” Baez sing hemq ndeu, gou ngamq yaek ndwn hwnjdaeuj youh naengh roengzbae lo. Yienznaeuz Aulungzgveiz bingzciengz gig hozunq, cungj deng dou riu de guhcaemz, hoeng ngoenzneix de miz di gvaiq, baenzlawz baenzneix yaep he

·Sawcuenhraez Lwngnyez·

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

angq yaep he huj? Caeux rox de baenzneix, mboujlwnh baenzlawz gou hix mbouj gamj byaij haeuj ndaw ranz de daeuj.

De yawj gou dauqcungz naengh roengzdaeuj, saeknaj sawqmwh youh bienq lo, lumj bingzciengz nei riunyumnyum, bungj vanj laeuj hwnjdaeuj, ndoet gij laeuj ndaw vanj sat bae, daek gij nohngwz ndaw rek coq youq aen vanj hung ndeu, caiq coq di raemx roengz ndaw rek bae, dawz aen rek cuengq youq gwnz cauq, doeklaeng cienq ndang doxdauq, naengh youq aen gvih ciengx ngwz

baihgwnz.

“Aulungzgveiz, gou siengj maranz lo.” Gou swngz de lij cingq-ciengz, caeuq de naeuz.

“Lij rongh.”

“Mbouj, mbwn yaep laep lo.”

“Yaep di gou soengq mwngz maranz!”

“Gou rox gag dauq.”

“Mbouj baenz, mwngz naengh gonq, haemhneix gou aeu gangj goj hawj mwngz dingq.”

“Ngoenzcog gangj baenz mbouj baenz? Gou iu Ah Veij gyoengqde youq laj gofaexnganx caj gou lo.”

“Mbouj baenz!” Aulungzgveiz aeu lwgfwnz vix naengbak de, sawq-mwh bienq ndaej gig unqswnh: “Haemhneix gou itdingh aeu gangj, caemhcaiq cij gangj hawj mwngz boux dog dingq ndwi! Rox lwi?”

Bonjlaiz gou ceiq ngah dingq gyoengq vunzhung gangj goj lo, lumjbaenz Baeuqroxdox caux mbwn-dieg、Mehlwg ra dinmbwn caeuq Daiqyahmui doenghgij goj neix, caen dwg dingq mbouj nywnx gvaq. Hoeng, ngoenzneix gou mbouj mbwq dingq lo, lau yaep he aiq deng de ndaq.

(caengz sat)